

SAMÞYKKT

um sorphreinsun fyrir Blönduós.

1. gr.

Blönduóshreppur annast eða býður út sorphreinsun innan skipulagðra svæða sveitarfélagsins, sbr. þó 6. gr.

Sorphreinsun fer fram undir yfirstjórn sveitarstjórnar og undir eftirliti heilbrigðisnefndar.

2. gr.

Sérhverjum húseiganda er skylt að hafa sorpgeymslu og sorphirðingu í samræmi við ákvæði samþykktar þessarar og eftir nánari fyrirmælum er heilbrigðisnefnd kann að gefa.

3. gr.

Allur kostnaður við almenna sorpeyðingu greiðist úr sveitarsjóði. Hverjum húseiganda er þó skylt að greiða sérstakt sorphreinsunargjald, sem sveitarstjórn ákveður í sérstakri gjaldskrá sem heilbrigðismálaráðherra staðfestir og innheimtist með fasteignagjöldum hvers árs.

4. gr.

Daglegt sorp frá íbúðarhúsum, veitingastöðum, verslunum og líkum rekstri skal láta í sérstaka poka, sem sveitarfélagið afhendir. Pokunum skal komið fyrir í þar til gerðum sorpskáp eða sérstakri grind, með viðeigandi frágangi og loki yfir. Húseigandi ber allan kostnað af uppsetningu og viðhaldi sorpgrinda og sorpskápa og ber að sjá um að grindur eða skápar séu í góðu ásigkomulagi.

Sorphirslur skulu vera aðgengilegar fyrir sorphreinsunarmenn. Húseigendum ber skylda til hreinsa snjó frá sorphirslum. Ef sorpgeymsla er innbyggð eða innandyra skal allur aðgangur að henni og frágangur vera í samræmi við ákvæði byggingarreglugerðar sbr. nánar 6. grein 8. tl. reglugerðar nr. 298/1978.

5. gr.

Í sorppoka má setja venjulegt heimilissorp, en gæta skal þess sérstaklega að offylla þá ekki né ofþyngja á þann hátt að erfitt verði að loka þeim eða að hætta sé á að þeir rifni. Sorp skal láta vel ofan í poka, varast að það hangi yfir pokarönd eða dreifist á lok umhverfis sorphirslur og valdi óþrífum. Öllu blautu sorpi svo og oddhvössum hlutum skal pakkað vel inn áður en slíkt er sett í sorpílát. Mold, mól, grjót og svipuð efni má ekki setja í sorppoka en skal flytja til ákveðins svæðis, skv. nánari fyrirmælum sveitarstjórnar og heilbrigðisnefndar. Á sama hátt má ekki setja eldfima vökva svo sem olíu og bensín í sorpílát, hvorki laust né í umbúðum. Sorphirðingarmönnum er heimilt að skilja eftir poka, sem fylltir eru um of, rifnir eða svo þungir að hætta sé á að þeir rifni.

6. gr.

Þeir aðilar, sem hafa með höndum starfsemi, sem krefst tíðari sorphirðingar, en um getur í 7. gr. að mati heilbrigðisnefndar, svo sem veitinga-, verslunar- og iðnaðarstöðvar, ber sjálfum að annast og kosta sína sorphirðu. Allt umfangsmeira sorp, svo sem frá byggingum

og málmiðnaði, bílhrae og allt brotajárn, skal hver hlutaðeigandi fjarlægja á eigin kostnað á afmarkað svæði, skv. nánari fyrirmælum sveitarstjórnar og heilbrigðisnefndar. Bannað er að urða olíuleifar og önnur efni, sem mengað geta jarðveg og bannað er að kasta slíkum efnum, svo sem öllu öðru sorpi í hvaða mynd sem er, í sjóinn eða í Blöndu. Skal slíku sorpi brennt eða því eytt á annan hátt, eftir því sem kostur er og skal slík eyðing fara fram undir eftirliti heilbrigðisnefndar.

7. gr.

Sorphreinsun skal framkvæmd vikulega og skal stefnt að því að hún fari fram á sama vikudegi við hvert hús.

Sorphirðing skal ekki framkvæmd á helgidögum eða eftir kl. 22 á virkum dögum. Hreppurinn leggur til og gengur frá í sorpskáp eða grind, einum plastpoka, eftir hverja hreinsun. Ef nauðsyn krefur t. d. vegna stórhátíða eða ef vænta má stöðvunar á sorphreinsun, geta húseigendur fengið aukapoka í áhaldahúsi hreppsins. Sé slíku ekki til að dreifa þá geta húseigendur engu að síður fengið aukapoka eftir þörfum, en þá kemur sérstök greiðsla fyrir, er nemur andvirði þeirra. Á stóru heimili eða þar sem vænta má að einn poki nægi ekki til milli hreinsana getur viðkomandi valið milli þess, að hafa fleiri grindur eða að hafa geymslu fyrir fyllta sorppoka og skiptir þá sjálfur um, enda fær hann þá ókeypis nægilega marga poka. Ef um óvenjulega notkun poka er að ræða, t. d. hjá veitingastöðum, verslunum o. s. frv. getur sveitarsjóður lagt á aukagjald vegna sorphreinsunar eða látið greiða fyrir aukapoka.

8. gr.

Allur flutningur á vegum einstaklinga, fyrirtækja eða aðila, sem annast sorphreinsun á vegum sveitarfélagsins á sorphauga, eða á þau afmörkuðu svæði, sem sveitarstjórn gefur fyrirmæli um, skal gerður eftir ströngustu fyrirmælum og þrífnaður allur í hávegum hafður. Sömuleiðis skal umgangur og frágangur á sorpi á sorphaugastað uppfylla þær kröfur, sem reglur um þá staði kveða á um t. d. um losunartíma sorps og umgengishætti alla.

9. gr.

Kvörtunum vegna sorphreinsunar skal komið skriflega til sveitarstjórnar eða heilbrigðisnefndar.

10. gr.

Með brot gegn samþykkt þessari skal farið í samræmi við ákvæði laga nr. 50/1981, um hollustuhætti og heilbrigðiseftirlit.

11. gr.

Um mál vegna brota á samþykkt þessari skal farið að hætti opinberra mála.

12. gr.

Ofangreind samþykkt hreppsnefndar Blönduósshrepps staðfestist hér með skv. 22. gr. laga nr. 50/1981, um hollustuhætti og heilbrigðiseftirlit, til þess að öðlast gildi þegar við birtingu.

Heilbrigðis- og tryggingamálaráðuneytið, 24. ágúst 1983.

F. h. r.

Páll Sigurðsson.

Ingimar Sigurðsson.